

## PIERCY, ROBERT (1825 - 1894), peiriannydd sifil

**Enw:** Robert Piercy  
**Dyddiad geni:** 1825  
**Dyddiad marw:** 1894  
**Priod:** Piercy (née Valleria)  
**Rhiant:** Robert Piercy  
**Rhyw:** Gwryw  
**Galwedigaeth:** peiriannydd sifil  
**Maes gweithgaredd:** Peirianeg, Adeiladu, Pensaerniaeth Forwrol ac Arolygu Tir  
**Awdur:** Evan David Jones

Ganwyd yn Nhrefglwys, Maldwyn, 25 Ionawr. 1825, mab hynaf Robert Piercy, a brawd [Benjamin](#). Addysgwyd ef yn ysgol ramadeg y Waun a'i hyfforddi yn swyddfa'i dad. O 1847 i 1855 bu'n beiriannydd i'r New British Iron Company, perchnogion glofeydd a gweithfeydd o gylch Acrefair. Bu'n arolygu eu rheilffyrdd, eu glofeydd, a'u gweithfeydd, ac yn adeiladu rheilffyrdd i Riwabon. Ymunodd â'i frawd, gan fod yn gyfrifol yn bennaf am y gwaith swyddfa, i adeiladu rheilffyrdd Sir Drefaldwyn, a byw i ddechrau yn y Trallwng, ac ar ôl hynny yn Llundain. Peiriannydd ymarferol ydoedd, uwchlaw popeth; mesurydd a lefelydd hyfedr, ac iddo enw am ei allu i drin seiliau bradwrus i bontydd. Rhwng 1870 a 1879, bu'n cynorthwyo'i frawd yn Sardinia; o 1879 i 1884 yr oedd yn adeiladu Rheilffordd Assam yn India. Yno darganfu ac agorodd wely anferth o lo, a ffynhonnau olew. Dychwelodd i Loegr yn 1887, gan dreulio'r rhan fwyaf o'i amser yn Llundain ac ysbeidiau yn yr Yswisdir. Bu farw 29 Ionawr 1894 yn y Celyn, Caergwrle, a chladdwyd ef ym mynwent eglwys y Waun. Ei wraig oedd Miss Valleria a briododd c. 1874. Bu iddynt un mab a dwy ferch.

### Awdur

Evan David Jones, (1903 - 1987)

### Ffynonellau

*Obituary: Robert Piercy, 1825-1894*, *Minutes of Proceedings of the Institution of Civil Engineers*, cxviii, 452-3

R. Williams, *Montgomeryshire Worthies (1894)*, 242

### Dolenni Ychwanegol

Wikidata: [Q20746839](https://www.wikidata.org/wiki/Q20746839)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

